

Es Wunner vum Wei no Johannes zwei

In Kana hat zu seller Zeit
e Mann sei Eheweib gefreit.
Un Jesus, weil er do war grad,
den hann'se aa mit eigelaad.

Sei Jünger ware mit debei.
Das war e großi Sauferei.
Un so is kumm, wie's kumme muss:
Me'm Wei war no drei Stunn schunn Schluss.

Die Mamma, sie hieß Maria,
hat dann zu Ihrem Sohn gesaa:
Die Leit, die hann so arisch Dorscht,
hau'n trocke runner Brot un Worscht.

Kannsch du dann net was mache?
De Bu fangt aa zu lache
un saat: Scher dich net drum,
mei Stunn is noch net kumm!

Doch wer ne kennt, de Sohn vum Gott,
wääß, dass der was im Rischpel hott.
Do stehn sechs Kanne voll mit Wasser,
e frommer Jude braucht se, dass er,
wann sei Fieß sinn voll mit Dreck,
er domit spielt de Dreck eweg.

Die, so saht er zu de Diener,
schnappen eich jetz un dann grieh'n er
vun mer noch was uffgetraa:
Er misse'm Kichechef drauß saa,
er soll die Brieh versuche
un dann no'm Appelkuche
de Hochzeitsgäscht kredenze.

Bin iwwerzeucht, dann hänn se
fer's erschte mol genug:
Zwölf Liter sinn's pro Krug!

De Koch nemmt sich e Suppekell,
versucht die Brieh uff alle Fäll,
spitzt 's Mailche, schlürft voller Genuss
un kummt zum fachmännische Schluss:
„Das is e Tröpchfe, mer mänt als,
der käm direkt dort aus de Palz.“

Er saat zum Bräutigam: „He du,
ich saa der was, jetzt heer gud zu:
De gude Wei werd erscht serviert,
un wann dann jeder denne spiert,
dann kummt de Fusel uff de Disch,
das merkt kä Mensch mehr, hasche mich?

Du hasch das grad verkehrt gemacht,
denksch bloß noch an die Hochzeitsnacht!“

So hot Jesus dozumo
Wei gezaubert aus H₂O.
S gäbt Winzer, die machen das heit noch so!

Un Jesus' Jünger war'n ganz hie,
als sie das Wunner hann gesieh
un hann ab dere Stunn,
ehre Chef ganz cool gefunn.

Das wollt ich zu Gehör eich bringe.
Jetzt duh'n mer awwer dabber singe.

(Das war's, was ich eich wollt berichte.
Gleich duht de Parre weiterdichte.)

